

ଯାକୁବଙ୍କ ପତ୍ର ଜାକୁବ ରାତାମାନି ଆକୁ ମୂଲୁ ହାଡ଼ା

ଈ ଜାକୁବ ପତିତି ଜାକୁବ ଇନାସି ରାତାମାଚେସି □ ଏଝାସି ଜୀସୁ କ୍ରୀସୁ ତାୟି ଆହାମାଣ୍‌ମିନେସି, ଏମ୍ମାଆସିକି କୁଲମିତି ସାଲଝି କିନାସି ଅଡ଼େ ଜିରୁସାଲମତା ବେରଣି କିନାସି ମାଚେସି କାମା ୧୫:୧୩ □ ପାଞ୍ଜୁଲ ଗାଲା ୨:୯ ଜାକୁବଙ୍କୁ କୁଲମିତି “ତୃଡ଼ିୟା ମୁଣ୍ଡା” ଇଞ୍ଜାମାନେସି □ ଜୀସୁ କ୍ରୀସୁ ଜାର୍ନାଆଡ଼ି ୫୦ ବାର୍ଯା ତାୟୁ ଈ ଜାକୁବ ପତି ରାସ୍‌କି ଆହାମାଚେ ଇଞ୍ଜି ବୁଦିଗାଟାରି ଏଲେ ଇଞ୍ଜିମାନେରି □ ଜାକୁବ ଜିରୁସାଲମତି କୁଲମି ସାଲଝି କିନାସି ମାତିବେଲାତା ଈ ପତିଈ ରାତାମାଚେସି □

ଜାକୁବ ତାନି ପତିତା “ଇତାଲା ଆତାଲା ଦେସାଣା ରାଞ୍ଜାଣା ବିଚାଣା ଆହାମାନି ବାର ଗଟା କୁଲୁ ଲକୁ” କାତା ରାତାମାନେସି ୧:୧ □ ଜାକୁବ ଝେହ୍ନି କାତା ବାରେ କ୍ରୀସ୍ତାନା ଲକୁକି ଲଡ଼ାମାନେ ସାମା “ବାର ଗଟା କୁଲୁ ଲକୁ” ଇତିସାରେ ଜୀହୁଦି କ୍ରୀସ୍ତାନା ଲକୁ □ ଏନାଆଁତାକି ଇତିହୁଁ ଈ ପତି ପଡ଼ଝିଆନି ବାରେ ଲକୁତାକି ହାରେକା କାତା ଏପହାଲି ତାକି ରାସ୍‌କି ଆହାମାନେ □ ଜାକୁବ ନାମୁ ଅଡ଼େ କାମାତି କାତା ଝେସାମାନେସି □ କାମାତା ସାତା ନାମୁ ତଞ୍ଜାଆନେ ୨:୧୭ □ ଏଝାସି ବାଡ଼କୁ ଗାଟି ଲକୁତି ପାରଡ଼ା ବାଟି କିନାଣି ୨:୧-୪ ଅଡ଼େ ମାର ଏନାଆଁ ଜଲିନାୟି ଜାଡ଼ନୁ ତଲେ ଜଲ୍‌ଲି ଝେସାମାନେସି ୩:୧-୧୨

ପତିତା ମାନାୟି

- ୧ ଜାକୁବ ତାନି ପତି ପଡ଼ଝି ଆନାରାଙ୍କୁ ଜହରା କିନାୟି □ ୧:୧
- ୨ କ୍ରୀସ୍ତାନା ଲକୁଣି କସ୍ତ ବେଲାତା ସୂସ୍ତି ତଲେ ମାଞ୍ଜାଲି ଝେହ୍ନାୟି □ ୧:୨-୨୭
- ୩ କାମା ତଲେ ନାମୁତି ତହ୍ନାୟି ମାନେ □ ୨:୧-୨୭
- ୪ ଜଲିନି ବଲୁୟାତି ବାଡ଼ୟୁ □ ୩:୧-୧୨

୫ ମାହାପୁରୁତି ବୁଦି ଦାର୍ତ୍ତିତି ବୁଦି କିହ୍ନା ହାରେକା ପାର୍ତ୍ତା ମାନେ

□ ୩:୧୩-୪:୧୦

୬ ବଡ଼ପଣ ଆନି କାତା □ ୪:୧୧-୫:୬

୭ ଜାକୁବ ରାନ୍ତି ବେଲାତା ନେହେଁତାକି ଜାପିନି କାତା ରାନ୍ତିନାୟି

□ ୫:୭-୨୦

୧ ☆ନାନୁ ଜାକୁବ, ମାହାପୁରୁ ଅଡ଼େ ପ୍ରବୁ ଜୀସୁ କ୍ରୀସ୍ତି ହଲେଏସି,
ଦାର୍ତ୍ତିତା ଇତାଲା ଆତାଲା ଆହାମାନି ମାହାପୁରୁ ଲକୁଇଁ ଜହରା □

ନାମୁତି ତାୟିପାରି କିନାୟି

୨ ଏ.ନା.ତାୟିୟାଁ ଅଡ଼େ ତାଙ୍ଗିସ୍ତା, ମୀରୁ ଏତିବେଲା ତାୟିପାରି
କିନି ତାଣା ତାୟିପାରି କିଞ୍ଜିଆଦେରି, ଏତିବେଲା ଏଦି ହାରେକା
ରାହାଁତି କାତା ଇଞ୍ଜିଁ ଅଶ୍‌ପାଦୁ;

୩ ତାୟିପାରି କିନାଣି ଜୀଣା ଆନି ନାମୁ ଏଦି ଅରହାଲି ହୀୟାନେ,
ଇଦାଆଁ ପୁଞ୍ଜାମାଞ୍ଜେରି □

୪ ଅଡ଼େ, ମୀରୁ ଏନିକିଁ ଏନି ଗୁଣୁତା ଉଣା ଆଆନା ନେହଁ
ତୀରି ଅଡ଼େ ସୁଦୁ ଗାଟାତେରି ଆଦୁ, ଏଦାଆଁତାକି ଅରହିନାୟି
ହାରେପୁରେ କାମା କିନେ □

୫ ସାମା ମୀ ବିତ୍ତା ଆମ୍ବାଆରାକି ବୁଦି ଉଣା ମାଟିସାରି, ଆମିନି
ମାହାପୁରୁ ଦହ ଆହୁଆନା ବାରେତାକି ହାରେପୁରେ କେନ୍ଦୁ ଦେତାନା
ଦାନା କିନେସି, ଏଞ୍ଜାଣି ତାଣା ପ୍ରାଡାନା କିପାସି, ଏମ୍ବାଟିଏ ଏଞ୍ଜାଣାକି
ହୀପକିଆନେ □

୬ ସାମା ଏଞ୍ଜାସି ଇତାଣି ଆନାମାନା ଆଆନା ନାମୁତଲେ ପ୍ରାଡାନା
କିପାସି, ଇତିହଁ ଆମ୍ବାଆସି ଆନାମାନା ଆନେସି, ଏଞ୍ଜାସି ଗାଲି
ତଲେ ଇତାଲା ଆତାଲା ଆହିମାନି ସାମ୍‌ବୁରିତି ତୀରି ଆଆଗାଟି ଏନ୍ଦୁ
ଉଣ୍ଡା ଲେହେଁତାସି □

୭ ଏଲେତି ଲକୁ ପ୍ରବୁ ତାଣାଟି ଏନାଆଁ ବେଟାଆକ୍ ଇଞ୍ଜିଁ ଆସା
କିଆପେସି;

୮ ଏଞ୍ଜାସି ରୀ ମନ୍ ଗାଟାସି, ଇଞ୍ଜା ତାନି ବାରେ କାମାତା ତୀରି
ଆଆଗାଟାସି □

☆ ୧:୧ ୧:୧ ମାତି ୧୩:୫୫; ମାର୍କ ୬:୩; କାମା ୧୫:୧୩; ଗାଲା ୧:୧୯

ବାଡ଼କୁ ଗାଟାସି ଅଡ଼େ ବାଡ଼କୁ ହିଲାଆଗାଟାସି

୯ ବାଡ଼କୁ ହିଲାଆଗାଟି ତାୟି ତାନି କାଜାପାଣା ତାକି ରାହାଁ କିପାସି,
୧୦ ବାଡ଼କୁ ଗାଟାସି ତାନି ଉଣା ଆହିମାନାଣି ତାକି ବତପଣ
କିପେସି, ଏନାଆଁତାକି ଇଚିହଁ ବାଡ଼କୁ ଗାଟାସି ଜାଡ଼ାତି ପୁରୁବଣ୍ଡା
ଲେହେଁ ତୁଲା ହାନେସି □

୧୧ ଏନିକଁ ଝେଡ଼ା ଲାଲ୍ ହତାସାରେ ଜାଡ଼ା ଏନିକଁ
ଝାୟାହାନେ ଅଡ଼େ ଏଦାନି ପୁଞ୍ଜା ତୁଲିନ୍ତୁ ଇଞ୍ଜା ତାନି ଅଦୁତି ଝାଣା
ମେଣ୍ଟାହାନେ, ଏଲେକିହଁ ଏ ବାଡ଼କୁ ଗାଟାସି ଜିକେଏ ତାନି
ବାରେ କାମାତା ଝାଡ଼ିନେସି □

ତାୟିପାରି ଅଡ଼େ ଜୁପକା ତହ୍ନାୟି

୧୨ ଆମିନି ଗାଟାସି ତାୟିପାରି କିନାଣି ଅରୁହନେସି ଏଝାଣାକି
ନେହେଁ, ଇଚିହଁ ମାହାପୁରୁ ତାନୁ ଜୀଝୁ ନନି ଲକୁଣି ଆମିନି
ଜୀଝୁଗାଟି ଟପେରି ହାହାଲି ଆଞ୍ଜାମାନେସି, ତାୟିପାରି କିତାଣି
ଜୀଣାଆଡ଼ି ଢେଟ ଏ ଲକୁ ଏ ଆଞ୍ଜାମାନି ଟପେରି ବେଟା ଆନେସି
□

୧୩ ଆମ୍ବାଆସି ତାୟିପାରି କିଝି ଆଡ଼ିସାରେ, “ନା ଲ ତାୟିପାରି କିଝି
ଆନାୟି ମାହାପୁରୁ ତାଣାଟି ଆହିମାନେ” ଇଞ୍ଜିହଁ ଇନାଆପେସି,
ଇଚିହଁ ମାହାପୁରୁ ଲାଗେଏତି ପାନ୍ଦାଟି ତାୟିପାରି କିଝି ଆଅସି,
ଅଡ଼େ ଏଝାସି ତାନୁଏ ଆମ୍ବାଆରାଲ୍ ତାୟିପାରି କିଅସି □

୧୪ ସାମା ମାଣସି ତାନି ଲାଗେଏତି କାମା ତଲେ ଜୁପକା ଅଡ଼େ
ନାଡ଼ିକିଝି ଆହାନା ତାୟିପାରି କିଝିଆନେସି;

୧୫ ଅଡ଼େ ତାୟି ଲାଗେଏତି କାମା ପୁରାମାସା ଆହାନା ପାପୁତି
ଜାନ କିନେ, ଇଞ୍ଜା ପାପୁ ଗାଡ଼ି ପାତାଆହାନା ହାକିତି ଜାନ କିନେ
□

୧୬ ଏ ନା ଜୀଝୁତି ତାୟିୟାଁ ଅଡ଼େ ତାଜିସ୍ତା ମୀରୁ ନାଡ଼ି ଆଆବୁ □

୧୭ ବାରେ ନେହଁ ଦାନା ଅଡ଼େ ବାରେ ତୀରିତି ବର ଲାକଟି;
ଇଚିହଁ ଉଜେଡ଼ି ଗାଡ଼ିକିତି ଆବା ତାଣାଟି ଝାନ୍, ଆମ୍ବାଆରି ତାଣା
ଏନି ବାଦଲି ଆନାୟି କି ଇତାୟିଝା ସାୟି କିହାନା ଆନ୍ଦେରି ଆନାୟି
ହିଲେଏ □

୧୮ ମାର ଏନିକ୍ ତାନି ଗାଡ଼ି ଆଡ଼ି ତାଣାଟି ରଲେଏତି ର ମୂଲୁତି ପାଡ଼େୟି ଲେହେଁ ଆନାୟି, ଏଦାଆଁତାକି ଏଝାସି ତାନି ଅଣ୍ପୁ ତଲେ ସାତା ବଲୁ ତଲେ ମାଙ୍ଗେ ଗାଡ଼ି କିୟାତେସି □

ୱେନାୟି ଅଡ଼େ କାମା କିନାୟି

୧୯ ଏ ନା ଜୀଝୁତି ତାୟିୟାଁ ଅଡ଼େ ତାଙ୍ଗିସ୍ତା, ମୀରୁ ଇଦାଆଁ ପୁଞ୍ଜାମାଞ୍ଜେରି, ମୀରୁ ବାରେତେରି ୱେଞ୍ଜାଲି ଜାଗ୍ରାତା ଆଦୁ, ଇଞ୍ଜା ୱେସାଲି ଦାଗା ଆଆଦୁ ଅଡ଼େ ଦେବୁଣିଏ କପା ଆଆଦୁ,

୨୦ ଇଚିହଁ ମାଣ୍ଡିତି କପା ମାହାପୁରୁତି ନକିତା ଦାମ୍ବୁ କିହାଲି ଆଡ଼େଏ □

୨୧ ଏଦାଆଁତାକି, ମୀରୁ ବାରେ ପଲ୍ଲଆ ଗାଟାଣି ଅଡ଼େ ବାରେ ଲାଗେଏତାଣି ପିସାତୁହ୍ଦୁ, ଆମିନି ମାହାପୁରୁ ହିୟାତି ବଲୁ, ମୀ ଜୀଝୁତି ଗେଲ୍‌ପାଲିତାକି ଆଡ଼ିନେ, ଏଦାଆଁ ସୁଦୁଗାଟି ଅଣ୍ପୁ ତଲେ ଆହ୍ଦୁ □

୨୨ ସାମା ମୀରୁ ଏଝାଣି ବଲୁ ୱେନାତେରି ଆହ୍ଁ ଜାହାରାଈଁ ନାଡ଼ି କିହାକତାଆନା, ବଲୁତି କାମା କିନାତେରି ଆଦୁ □

୨୩ ଇଚିହଁ ଆମିନିଗାଟାସି ବଲୁତି କାମା କିନି ଲକୁ ଆଆନା ୱାରଇ ୱେନି ଲକୁ ଆନେସି, ଆତିହଁ ଏଝାସି ଦାପେଣିତା ତାନୁଏ ତାନି ମୂମ୍ବୁ ସିନିକିହା କତିମାନି ମାଣ୍ଡି ଲେହେଁତାସି,

୨୪ ଏଡେତା ଏଝାସି ତାଙ୍ଗେ ସିନିକିତି ଜେଟ ହାଜାନା, ଏଝାସି ଏମ୍ବାଟି ହଟା ହାଟି ତାୟୁ ଏନିଲେହେଁତି ମାଣ୍ଡି ଦେବୁଣିଏ ବାଣାଆନେସି □

୨୫ ସାମା ଆମ୍ବାଆସି ତୀରପୁ ଇଚିହଁ ଗେଲ୍‌ପାଲି ଆଡ଼ିନି ନେହଁ ମେରାତି ସିନିକିହାନା ମେରାତି କାମା କିନେସି, ଅଡ଼େ ଆଜିତାକି ୱେନି ଲକୁ ଆଆନା କାମାକିନାସି ଆନେସି, ଏଝାସି ତାନି କାମାତା ନେହଁସି □

୨୬ ଇଚିହଁ ଆମ୍ବାଆସି ଜାହାରାଈଁ ତୀରି ଗାଟାତେଏଁ ଇଞ୍ଜାଁ ଅଣ୍ପା କତିନେସି, ଇଞ୍ଜାଁ ତାନି ୱେନ୍‌ରିତି ଲକ୍‌ଆନା ତାନୁ ତାନି ହିୟାତି ନାଡ଼ି କିନେସି, ଇଚିହଁ ତାନି ଦାମ୍ବୁକାମା କିନାୟି ଉଜେଏତାୟି □

୨୭ ତାଲି ତାଞ୍ଜି ହିଲାଆ କକାରି ପଦାଣି ଅଡେ ରାଣେଣି
 ଇୟାସିକାଣି ତାମି ଦୁକୁ କାକୁଲି ବେଲାତା ସାଢେମି କିନାୟି ଅଡେ
 ଦାରୁତିତା ମାନି ବାରେ ଲାଗେଏତି କାମାଟି ଗେଲପା କଡିନାୟି, ଇଦି
 ମା ମାହାପୁରୁ ଅଡେ ଆବା ନକିତା ନେହାୟି ଅଡେ ସୁଦୁ ଦାମୁତି କାମା
 □

୨

ପାରଡା ବାଟି କିନାୟି

୧ ଏ ନା ତାୟିୟା ଅଡେ ତାଞ୍ଜିସ୍ତା, ମା ଗାଞ୍ଜୁରମିଗାଟି ପ୍ରତୁ
 ଜୀସୁ କ୍ରୀସ୍ତ ତାଣା ନାମା ମାନାତେରି ମାଣସିୟାତି ମୁମୁମେସାନା
 ଲେମ୍ବାଆଦୁ □

୨ ଇତିହ ରଅସି ବାଂଗାରା ମୁଦି ଅଡେ ଦାରାଗାଟି ନେହ
 ଅକ୍ତିତି ହିମ୍ବରି ହୁତାନା କୁଟମି କୁଡା ଆହାମାନି ତାଣା ଝାନ୍ନେସି, ଅଡେ
 ର ହିଲାଆଗାଟାସି ଗେଞ୍ଜାମାନି ମାହୁତି ହିମ୍ବରି ହୁତାନା ଝାନ୍ନେସି,

୩ ଅଡେ, ମୀରୁ ଦାରାଗାଟି ଅକ୍ତିତି ହିମ୍ବରି ହୁତିତି ଲକୁଇଁ ମାନି
 କିହାଁ ଏଲେଇଞ୍ଜେରି, “ଇମ୍ବାଆଁ ନେହୁଁ ଚାୟୁତା କୁଗାମୁ,” ଅଡେ
 ହିଲାଆଗାଟାଣାଇଁ ଏଲେଇଞ୍ଜେରି “ଏମ୍ବାଆଁ ନିଚାମାନାମୁ, ଆଆତ
 ନା କଡାୟାଁ ତୁଇକା କୁଗାମୁ,”

୪ ଆଆତ ମୀରୁ ମୀ ବିତ୍ରା କାଜା ଲକୁ ଉଣା ଲକୁ ପାରଡା ବାଟି
 କିଞ୍ଚି ଆହାଁ ଏଟକା ଏଟକା କିହାଁ ଲାଗେଏତି ନୀହାୟି କିହିମାଞ୍ଜେରି
 □

୫ ଏ ନା ଜୀଞ୍ଜୁତି ତାୟିୟା ଅଡେ ତାଞ୍ଜିସ୍ତା, ଝେଞ୍ଜୁ, ମାହାପୁରୁ ଇ
 ଦାରୁତିତା ବାଡକୁ ହିଲାଆଗାଟାରାଇଁ ତାମି ନାମୁତା ଦନ୍ ଗାଟାରି
 ଆହାଲି, ଅଡେ ତାନି ଜୀଞ୍ଜୁନହୁଁ ମାନାରାଇଁ ଆମିନି ରାଡି ହୀହାଲି
 ଆଞ୍ଜାମାନେସି, ଏମ୍ବାତି ଅଦିକାରା କିହାଲି ଆଡା ହିଲଅସି ?

୬ ସାମା ମୀରୁ କାକୁଲି ଗାଟାରାଇଁ ଅପିହିଲଅତେରି □ ବାଡକୁ
 ଗାଟାରି ମୀ ମୁହେଁ ରାଡି କିୟଅରି କି ? ଅଡେ ମିଙ୍ଗେ ନୀହାୟି
 ପାଙ୍ଗାତା ରେଜା ଅୟଅରି କି ?

୭ ଆମିନି କାଜା ଦରୁତଲେ ଝେଙ୍ଗା ମାଞ୍ଜେରି, ଏନାଆଁ ଏଞ୍ଜାରି ଏ
 ଦରୁତି ନିନ୍ଦା କିଅରି □

୮ ମୀରୁ ମୀ ପାଡ଼ିତି ଲକୁଣି ମୀ ଜୀଞ୍ଜୁତି ଜୀଞ୍ଜୁ ନନ୍ତି ଲେହେଁ
ଜୀଞ୍ଜୁନଦୁ, ସାଢ଼େସ୍ତରିତା ରାସ୍ତାକି ଆହାମାନି ମାହାପୁରୁ ରାଜିତି ମେରା
ସାତେଏ ମାନୁଞ୍ଜି ଆଦେରି, ଆତିହୁଁ ମୀରୁ ନେହୁଁ କିହିମାଞ୍ଜେରି,

୯ ସାମା ଲକୁ ମୁମୁଡ଼ି ମେସାନା ଲେମ୍ବିମାଞ୍ଜେରି, ଆତିହୁଁ ମୀରୁ
ପାପୁ କିହିମାଞ୍ଜେରି, ଅଡ଼େ ଏ ମେରା ତଲେ ଦହ ଗାଟାତେରି ଇଞ୍ଜୁ
ତଞ୍ଜା ଆହିମାଞ୍ଜେରି □

୧୦ ଆମ୍ବାଆସି ବାରେ ମସାତି ମେରା ମାନୁଞ୍ଜି ଆହାଁ ରଣ୍ଡିଏ ମେରାତି
ଡରିନେସି, ଇତିହୁଁ ଏଞ୍ଜାସି ବାରେ ମେରାତି ଦହ ତଲେ ତଣ୍ଡ ବେଟା
ଆନେସି □

୧୧ ଆମିନି ମାହାପୁରୁ ଦାରିକାମା କିଆଦୁ ଇଞ୍ଜୁଁ ଝେସା
ମାଟାସି, ଏଞ୍ଜାସି ଲକୁଣି ପାୟାଆଦୁ ଇଞ୍ଜୁଁ ଜିକେଏ ଝେସାମାନେସି,
ମୀରୁ ଦାରିକାମା କିଆନା ଲକୁଣି ପାୟିଦେରି ଇତିହୁଁ ମେରାତି
ଡରିନାତେରି ଆଦେରି □

୧୨ ଗେଲ୍‌ପିଆଡ଼ି ମସାତି ମେରାତି ମୀରୁ ନୀହାଁୟି କିଞ୍ଜିଆଦେରି,
ଇଦାଆଁ ପୁଞ୍ଜାନା ଏଲେତି କାତା ଜଳାଦୁ ଇଞ୍ଜାଁ କାମା କିଦୁ □

୧୩ ଇତିହୁଁ ଆମ୍ବାଆସି କାର୍ମା ମେହୁଅସି ମାହାପୁରୁ ଏଞ୍ଜାଣାଜ୍
କାର୍ମା ମେହୁଆନା ନୀହାଁୟି କିନେସି, ସାମା କାର୍ମା ମେହୁନାସି
ନୀହାଁୟିତା ଜୀଣା ଆନେସି □

ନାମୁ ଅଡ଼େ କାମା

୧୪ ଏ ନା ତାୟିୟାଁ ଅଡ଼େ ତାଜିୟା, ଆମ୍ବାଆସି ନାଙ୍ଗେ ନାମୁ ମାନେ
ଇଞ୍ଜୁଁ ଇନେସି, ସାମା ଏଞ୍ଜାଣି କାମା ହିଲେଏ, ଆତୁଁ ଏଡ଼ି ଏଡ଼ି
ଲାବା ? ଇଲେତି ନାମୁ ଆମ୍ବାଆରାଜ୍ ଗେଲ୍‌ପାଲି ଆଡ଼ିନେ କି ?

୧୫ ଏତିବେଲା ର ତାୟି କି ତାଜିନାକି ହୁଟାଲି ହିମ୍ବୁରି କି ତିଞ୍ଜାଲି
ରାନ୍ଦା ହିଲାଆତିହୁଁ,

୧୬ ଇଞ୍ଜାଁ ମୀ ବିତ୍ରାତି ଆମ୍ବାଆତେରି ତାନି ଆଙ୍ଗାତି ଲଡ଼ାମାନାଣି
ହୀଆନା, “ମାହାପୁରୁ ନିଙ୍ଗେ ବର ହିୟାପେସି, ବାଣ୍ଡି ପାଞ୍ଜାହାଁ
ହିଡ଼ଡ଼ିଟି ନେହୁଁ କି ହାଲାମୁ” ଇଞ୍ଜୁଁ ଇତିହୁଁ ଏଡ଼ି ଏଡ଼ି ଲାବା
?

୧୭ ଏଲେକିହୁଁଏ, କାମା ହିଲାଆସାରେ ନାମୁ ହାଡ଼ାୟି □

୧୮ ସାମା ଆମ୍ବାଆସି ଏଲେଇନେସି, “ରଥଣି ନାମୁ ମାନେ ଅଡ଼େ ରଥଣି କାମା ମାନେ;” କାମା ହିଲାଆନା ନୀ ନାମୁ ତସ୍ତାମୁ, ଅଡ଼େ ନାମୁ କାମା ତଲେ ନା ନାମୁତି ତସ୍ତାଲ୍ ।

୧୯ ମାହାପୁରୁ ରଥସିଏ, ଇଦାଆଁ ମୀରୁ ନାମିମାଞ୍ଜେରି; ଏଡ଼ି ନେହଁ କାତା, ବୁତୁୟାଁ ଜିକେଏ ନାମାହାଁ ଆଜିତାକି ତୀରୁଗିମାନୁ ।

୨୦ ସାମା ଏ ବୁଦି ହିଲାଆଗାଟାତେରି, କାମା ହିଲାଆନା ନାମୁ ଉଜେଏତାୟି, ଇଦାଆଁ ପୁଞ୍ଜି ହିଲଅତେରି ?

୨୧ ମା ଆକୁ ଅବ୍ରାହାମ, ପୂଜାପିଣ୍ଡା ଲାକ ତାନି ମୀରୁଏଣା ଇସାହାକଲ୍ ପୂଜା କିହିମାଟାଟି କାମା ତଲେ ଦାର୍ମୁଗାଟାସି ଇଞ୍ଜଁ ଝେଙ୍ଗା ହିଲାଆତେସି ?

୨୨ ମୀରୁ ମେସିମାଞ୍ଜେରି, ଅବ୍ରାହାମତି ନାମୁ ତାନି କାମାତା ତଞ୍ଜାଆଡ଼େ, ଅଡ଼େ କାମା ତଲେ ନାମୁ ପୁରାଆଡ଼େ;

୨୩ ଏଚେଟିଏ ସାସ୍ତେରିତି ଇ ବଲୁ ସାତା ଆଡେ, ଅବ୍ରାହାମ ମାହାପୁରୁ ତାଣା ନାମିତେସି, ଅଡ଼େ ତାଙ୍ଗେତାକି ଏଡ଼ି ଦାର୍ମୁଗାଟାସି ଇଞ୍ଜଁ ଝେଙ୍ଗିତେସି, ଇଞ୍ଜା ଏଝାସି ମାହାପୁରୁତି ତଣେଏସି ଇଞ୍ଜଁ ଝେଙ୍ଗିତେସି ।

୨୪ ଇତିହଁ ମାଣସି ଝାରୁଇ ନାମୁଟି ଆଏ, ସାମା ତାନି କାମାଟି ଦାର୍ମୁଗାଟାସି ଆନେସି ଇଞ୍ଜଁ ମୀରୁ ପୁଞ୍ଜିମାଞ୍ଜେରି ।

୨୫ ଏଲେକିହଁଏ ଦାରେଣି ରାହାବ୍ ଦାର୍ମୁଗାଟାୟି ଇଞ୍ଜଁ ଝେଙ୍ଗାମାତେ, ଏଡ଼ି ପାରୁ ପାରାଲି ମେଣେଏ ଝାହାମାତାରାଲ୍ ତାନି ଇଜ ଅହାନା ଇଟିତେ ଇଞ୍ଜା ଏଟ୍‌କା ଜିରୁଟି ପାଣ୍ଡାଲି ସାୟେମି କିହାମାତେ ।

୨୬ ଇତିହଁ ଜୀଝୁ ହିଲାଆସାରେ ଆଙ୍ଗା ହାଡ଼ି ମାଡ଼ହା, ଏଲେକିହଁଏ କାମା ହିଲାଆସାରେ ନାମୁ ଜିକେଏ ହାଡ଼ାୟି ।

୩

ଝେନ୍ଦରିତି ଲକ୍‌ନାୟି

୧ ଏ ନା ଡାୟିୟା ଅଡ଼େ ତାଙ୍ଗିୟା, ମୀରୁ ହାରେକା ଜାପ୍ନାତେରି ଆଆଦୁ; ଜାପ୍ନାତାୟି ମାର, ମାର ଅର ଲକୁ କିହାଁ ହାରେକା ତଣ୍ଡ ପାଣ୍ଡନାୟି ଇଦାଆଁ ପୁଞ୍ଜାମାଞ୍ଜୁ □

୨ ଇତିହୁଁ ମାର ଏନ୍ ଏନ୍ କାମାତା ପୁଟି କିହିମାନାୟି, ସାମା ଆମ୍ବାଆସି ମାହାପୁରୁ ବଲୁତା ପିଟଞ୍ଜି ଆଅସି, ଆତିହୁଁ ଏଞ୍ଜାସି ନେହୁଁ ମାଣ୍ଡସି, ଅଡ଼େ ଏଞ୍ଜାସି ତାନି ବାରେ ଆଙ୍ଗାତି ତାନୁଏ ଲକ୍‌ହାଲି ଆଡ଼ିମାନେସି □

୩ ମାର ଗଡ଼ାୟାଣି ଲକ୍‌ହାଲି ତାକି ତାନି ଗୁତିତା ବାକେରି କାଟିକିହିମାନାୟି, ଅଡ଼େ ଏଦାନିତଲେ ମାର ତାନି ବାରେ ଆଙ୍ଗାତି ଝେଟ୍‌ହି ମାନାୟି □

୪ ଏୟୁ ଜାଜାତି କାତା ଜିକେଏ ଅଣ୍ଡପାଦୁ, ଏଡ଼ି ଏରେକା କାଜାୟି ଅଡ଼େ କାଜା ଗାଲି ତଲେ ତାକିତୁଁ ଜିକେଏ, ଜାଜାତି ତାୟୁଞ୍ଜାକି ମାନି ର ଡ଼ଣା ମାରା ତଲେ ତାକିନେ, ଏ ମାରା ଆହ୍‌ନାସି ଆମ୍ବିୟାଞ୍ଜାକି ମନ୍ କିନେସି ଏନିକା ହାନେ □

୫ ଏଲେକିହୁଁଏ ଝେନ୍‌ରି ଜିକେଏ ଆଙ୍ଗାତି ର ଡ଼ଣା ବାଗା ଆତିହୁଁ ଜିକେଏ, ଏଡ଼ି କାଜା ବଡ଼ପଣତି କାତା ଜଲ୍‌ଲି ଆଡ଼ିନେ □ ମେହ୍‌ଦୁ ର ଡ଼ଣା ହିରୁ ପୁୟା ତଲେ ଏରେ କାଜା ଜାଡ଼ା ଝେହାହାନେ □

୬ ଝେନ୍‌ରି ଜିକେଏ ହିରୁ ଲେହେଁତାୟି; ଏଡ଼ି ମା ଆଙ୍ଗା ବିତ୍ରା ବାରେ ଲାଗେଏ ପଲେଏ ତାଣାଟି ସାଲ୍‌ଞ୍ଜି ଆହିମାନେ, ଏଡ଼ି ବାରେ ଆଙ୍ଗାତି ଲାଗେଏ କିନେ, ଅଡ଼େ ତାନୁ ନର୍କଟି ହଡ଼ିମାନି ହିରୁତଲେ ଡ଼ାଞ୍ଜାନା ଗାଡ଼ି ଆହାମାନି ଦାରତିତି ହୁତିନେ □

୭ ଇଞ୍ଜା ବାରେ ଲେହେଁତି ଜନ୍ତୁ ଜିଞ୍ଜେଡ଼ି, ପଟା କାଟି, ବାଣ୍ଡିତଲେ ତାକିନାଲ, ଅଡ଼େ ଏୟୁତି ଜନ୍ତୁ, ମାଣ୍ଡସି ଏ ବାରେ ଜନ୍ତୁୟାଣି ଲକ୍‌ହାଲି ଆଡ଼ିମାନେସି □

୮ ସାମା ଝେନ୍‌ରିତି ଆମ୍ବାଆସି ଲକ୍‌ହାନା ସାପି କିହାଲି ଆଡ଼ଅସି, ଏଡ଼ି ପଲ୍‌ଆ ଗାଟାୟି ଇଞ୍ଜା ଲଙ୍ଗାଆ ଗାଟାୟି, ଅଡ଼େ ଏଡ଼ିଏମ୍ବାଆଁ ହାନ୍ତିମାନି ବୀସା ମାନେ □

୯ ଝେନ୍‌ରି ତଲେ ପ୍ରୁ ଆବାଇଁ ଜହରା କିହିମାନାୟି, ଇଞ୍ଜା ଏ ଝେନ୍‌ରି ତଲେ ମାହାପୁରୁ ଲେହେଁ ଗାଡ଼ି ଆଡ଼ି ମାଣ୍ଡସିଇଁ ବାକା ଇଟି

ମାନାୟି;

୧୦ ଏ ରଣିଏ ଗୁଡିଟି ଜହରା କିନାୟି ଅଡ଼େ ବାକା ହାନି କାତା ହଡ଼ିମାନେ ଏ ନା ତାୟିୟା ଅଡ଼େ ତାଜିସ୍ତା ଏଲେଆନାୟି ନେହେଁ ଆଏ □

୧୧ ର ଜାରଣାଟି ଡାକ୍ନି ଅଡ଼େ କାମ୍ବେଲି ଏୟୁ ହନୁ କି ?

୧୨ ଏ ନା ତାୟିୟା ଅଡ଼େ ତାଜିସ୍ତା, ତୟା ମାର୍ନୁତା ଜୀତ ପାଡ଼େୟି ଅଡ଼େ ଅଜୁରିମାଡ଼ାତା ତୟା ପାଡ଼େୟି ଆୟାଲି ଆଡ଼ିନେ କି ? ଏଲେକିହ ଏ ହାରୁ ଜାରଣା ଡାକ୍ନି ଏୟୁହୀହାଲି ଆଡ଼େଏ □

ମାହାପୁରୁ ତାଣାଟି ଖାନ୍ତି ବୁଦି

୧୩ ମୀ ବିତ୍ରା ବୁଦିଗାଟାସି ଅଡ଼େ ତେଲ୍‌ହିନାସି ଆମ୍ବାଆସି ମାନେସି ? ଏଝାସି ବୁଦିଗାଟାସି ଲେହେଁ ଡଣା ଆହାନା ଇଞ୍ଜା ସୁଦୁଗାଟାସି ଆହାନା ତାନି ନେହେଁ ମାଣ୍‌କି ତଲେ କାମା ତସ୍‌ପେସି □

୧୪ ସାମା ମୀ ହିୟାତା ଗାଡି ତାହାରା, କପା ଅଡ଼େ ଖାରଇ ଜାହାରାତାକି ଅଣ୍‌ପିନାୟି ମାନେ, ଆଡିହେଁ ସାତାଡି କପାଟି ବତପଣ ଆଆଦୁ ଅଡ଼େ ମିଟି ଜଲ୍‌ଆଦୁ □

୧୫ ଇଲେତି ବୁଦି ମାହାପୁରୁ ତାଣାଟି ଖାଏ, ଏଦି ଇ ଦାର୍‌ଡିତାୟି, ମାଣ୍‌ସିତି ଅଣ୍‌ପୁ ଗାଟାୟି ଅଡ଼େ ଲାଗେଏ ପଲେଏଡି ବୃତୁୟା ଖାୟି □

୧୬ ଇଡିହେଁ ଆମିନି ତାଣା ତାହାରା ଅଡ଼େ ଜାହାରାତାକି ଅଣ୍‌ପିନାୟି ମାନେ, ଏ ଟାୟୁତା ବାରେଲେହେଁତି ଲାଗେଏଡି କାମା ମାନେ □

୧୭ ସାମା ଲାକଟି ଖାନ୍ତି ବୁଦି, ତଲିଏ ସୁଦୁଗାଟାୟି, ତାୟୁ ହିଡ଼ି ଜୀଝୁଗାଟାୟି ଅଡ଼େ ସୁଦୁ ସୁଝାଲା, ମାନଝି ଆନାୟି, କାର୍ମାନେହନାୟି ଅଡ଼େ ନେହେଁ ପାଡ଼େୟିକା ତଲେ ନେଞ୍ଜାମାନାୟି, ଆନାମାନା ଆଆଗାଟାୟି ଅଡ଼େ କୁଟୁ ହିଲ୍‌ଆଗାଟାୟି □

୧୮ ଅଡ଼େ ହିଡ଼ି ହାନି ଲକୁ ତାଣାଟି ହିଡ଼ିଡି ବିଚା ମାଟ୍‌ଝିଆନେ, ଦାର୍‌ମୁଗାଟି ପାଡ଼େୟି ଦାପି ଆନେ □

୪

ଦାର୍‌ଡି ତଲେ ତଡ଼ଣ ଦହନାୟି

୧ ମୀ ତାଣା ମାତାଗଡ଼ି ଅଡ଼େ ଗଡ଼ହା ଆସିତି ଖାହିମାନେ ? ଏଡ଼ି ମୀ ତାଣା ମାନି ସୁକୁତି ଅଣ୍ଟପୁଟି ଖାହିମାନୁ ଏଡ଼ି ବାରେ ବେଲା ଗଡ଼ହା କିଞ୍ଚିକହିମାନୁ □

୨ ମୀରୁ ଏନାଆଁ ବେଟାଆହାଲି ଅଣ୍ଟପା ମାଞ୍ଜେରି, ଏନାଆଁ ବେଟା ଆଆସାରେ ଲକୁଣି ପାୟାଲି ଅଣ୍ଟପା ମାଞ୍ଜେରି, ଏନାଆଁ ବେଟାଆହାଲି ହାରେକା ଜୁପ୍‌କା ଆନେ ଏନାଆଁ ବେଟା ଆଆସାରେ ଗଡ଼ହା ଅଡ଼େ ମାତାଗଡ଼ି କହିମାଞ୍ଜେରି, ଏନାଆଁତାକି ଇତିହଁ ମୀରୁ ମାହାପୁରୁଇଁ ରାସି ହିଲଅତେରି;

୩ ମୀରୁ ରାସିମାଞ୍ଜେରି ସାମା ବେଟାଆହି ହିଲଅତେରି, ଏନାଆଁତାକି ଇତିହଁ ମୀରୁ ମୀ ଆଙ୍ଗାତି ଜୁପ୍‌କାଟି ଲେମ୍ବାଲି ତାକି ପାପୁ କାମା କିହାଲି ରାସିମାଞ୍ଜେରି □

୪ ଏ ଦାରେଣିସିକାତେରି, ମୀରୁ ପୁଞ୍ଜାହିଲଅତେରି ? ଦାର୍ତତିତ ତଣେ ଆନାସି ଏଞ୍ଜାସି ମାହାପୁରୁତି ସାଡୁ, ଇତିହଁ ଆମ୍ବାଆସି ଇ ଦାର୍ତତିତ ତଣେ ଆହାଲି ଅଣ୍ଟପିନେସି; ଏଞ୍ଜାସି ମାହାପୁରୁତି ସାଡୁ □

୫ ମୀରୁ ଏନାଆଁ ଦାମ୍ବୁ ପତିତା ରାସ୍‌କି ଆହାମାନି ବଲୁ ଉଜେଏ ଇଞ୍ଜଁ ଅଣ୍ଟପିମାଞ୍ଜେରି କି, “ମାହାପୁରୁ ଆମିନି ଜୀଞ୍ଜୁତି ମା ତାଣା ବାସା ଆହାଲି ହାହାମାଞ୍ଜାନେସି, ଏଞ୍ଜାସି ମାଙ୍ଗେ ବାରେ ଖାକିଟି ସାଲୁଞ୍ଜି କିହାଲି ଅଣ୍ଟପିମାନେସି □”

୬ ସାମା ମାହାପୁରୁ ହାରେକା କାର୍ମାମେହନାଣି ହିୟାନେସି; ଏନାଆଁତାକି ସାସ୍ତେରିତା ରାସ୍‌କି ଆହାମାନେ, “ମାହାପୁରୁ ଆଙ୍ଗାରା ଆନାରି କପାଟି ନିଜିନେସି, ସାମା ଜାହାରାଇଁ ଡ଼ଣା କିହା କତାମାନାରାଇଁ କାର୍ମା ମେହନେସି, ମାହାପୁରୁତି କାର୍ମା ହାରେକା ବାଡ଼ୟୁ ଗାଟାୟି □”

୭ ଏନାଆଁତାକି ମୀରୁ ମାହାପୁରୁ ତାଣା ହେରପା କତାଦୁ; ଅଡ଼େ ସୟତାନଇଁ ଆବାଆଦୁ, ଆତିହଁ ଏଡ଼ି ମୀ ତାଣାଟି ହେକ ହାନେ □

୮ ମାହାପୁରୁ ତାଗେ ଖାଦୁ ଆତିହଁ ଏଞ୍ଜାସି ମୀ ତାଗେ ଖାନେସି, ଏ ପାପୁ ଗାଟାତେରି, ମୀ କେସ୍‌ଣାଣି ନେହଁ କଁ ନରଦୁ, ଅଡ଼େ ରୀ ଅଣ୍ଟପୁ ଗାଟାତେରି, ମୀ ହିୟାତି ଅଟ୍‌ହା କତାଦୁ □

୯ ହିୟା କାଡ଼ି କିହାଁ ଦୁକୁତଲେ ଡ଼ୀଦୁ; ମୀ କାକ୍‌ନାୟି ଡ଼ୀକିତା

ଅଡ଼େ ମୀ ରାହାଁ ଦୁକୁଡା ତୀରି ମୁଁପେ □

୧୦ ପ୍ରବୁତି ନକିତା ମୀରୁ ମିଙ୍ଗେ ଉଣା କିହାକତାଦୁ, ଏଚେଟିଏ
ଏଝାସି ମିଙ୍ଗେ କାଜା ଲକୁ କିୟାନେସି □

ଏଟକା ଲକୁଣି ନୀହାଁୟି କିଆଦୁ

୧୧ ଏ ତାୟି ତାଙ୍ଗିସ୍ତା, ମୀରୁ ରଅତେରି ରଅଣା କପାଟି ନିନ୍ଦା
କାତା ଜଲ୍ଲାଆଦୁ; ଆମ୍ବାଆସି ତାୟି କପାଟି ନିନ୍ଦା କାତା ଜଲ୍ଲିନେସି କି
ନୀହାଁୟି କିନେସି, ଏଝାସି ମସା ମେରା କପାଟି ଜଲ୍ଲିମାନେସି, ଇଞ୍ଜା
ଏମ୍ବାତି ନୀହାଁୟି କିହିମାନେସି □ ସାମା ମୀରୁ ମସା ମେରାତି ନୀହାଁୟି
କିଦେରି, ଇତିହୁଁ ମୀରୁ ମସା ମେରାତି ମାନୁଝି ଆନାତେରି ଆଆନା
ଏମ୍ବାତି ନୀହାଁୟି କିନାତେରି □

୧୨ ମାହାପୁରୁ ରଅସିଏ ମେରା ହୀନାସି ଅଡ଼େ ନୀହାଁୟି କିନାସି,
ଏଝାସି ଗେଲ୍‌ପାଲି ଅଡ଼େ ନାସା କିହାଲି ଆଡ଼ିମାନେସି; ସାମା ନୀନୁ
ଆମ୍ବାଆତି, ନୀ ଆଟ୍‌ହିତାଣାଇଁ ନୀହାଁୟି କିହିମାଞ୍ଜି ?

ବଡପଣ କିଆଦୁ

୧୩ ନୀର୍ବ ମେହ୍‌ଦୁ, ଆମ୍ବାଆତେରି ଏଲେ ଇଞ୍ଜିମାଞ୍ଜେରି, “ନୀଞ୍ଜୁ
କି ଝିଏ ମାମ୍ବୁଏ ଗାଡ଼ାତା ହାନମି ଇଞ୍ଜା ଏମ୍ବାଆଁ ର ବାସା ପାତେକା
ଡ଼ୟାନା ବେବାରା କିହାଁ ଗାତି ଲାବା କିନମି;”

୧୪ ସାମା ଝିଏ ଏନାୟି ଆନେ, ଏଦାଆଁ ମୀରୁ ପୁଞ୍ଜାହିଲଅତେରି,
ମୀ ଜୀଝୁ ଏନିକଁ ଗାଡ଼େକା ତଞ୍ଜାଆହାନା ଗାଡ଼େକା ମେଣ୍‌ଙ୍ଗାହାନି
ଡକଅଡ଼ି, ମୀରୁ ଏଲେତାତେରି □

୧୫ ଇଦାଆଁତାକି ମୀରୁ ଏଲେଇନାୟି ମାନେ, “ପ୍ରବୁତି ଅଣ୍‌ପୁ
ଆଡ଼ିସାରେ ମାର ଜୀଝୁତଲେ ନୀତା ମାଞ୍ଜାନା ଇଦାଆଁ କିନ ଆଆଡ଼ି
ଏଦାଆଁ କିନ □”

୧୬ ସାମା ମୀରୁ ନୀର୍ବ ମୀ ବଡପଣ ତସାକତିମାଞ୍ଜେରି; ଇଲେତି
ବଡପଣ ଲାଗେଏତାୟି □

୧୭ ଏନାଆଁତାକି ଇତିହୁଁ, ଆମ୍ବାଆସି ନେହୁଁ କାମା କିହାଲି
ପୁଞ୍ଜାନା କିଅସି ଏଝାସି ପାପୁ କିନେସି □

୫

ବାଡ଼କୁ ଗାଟାରାଇଁ ଜାଗ୍ରତା କିନାୟି

୧ ଏ ବାଡ଼କୁ ଗାଟାତେରି ନା କାତା ଖେଞ୍ଜୁ, କସ୍ତତି ଦିନା ଖାହିମାନେ
ଏଡ଼ାଆଁତାକି ଦୁକୁଆହୁଁ ଡ଼ୀବୁ ଇଞ୍ଜା କାନିକାର୍ମା ଆଦୁ □

୨ ☆ମୀ ବାରେ ଦନ୍ ସୀରହା ହାଚେୟିଏ, ଅଡ଼େ ମୀ ହିମ୍ବରିକାଇଁ
ଲୀମ୍ବୁ ତିରେୟିଏ,

୩ ଅଡ଼େ ମୀ ବଂଗାରା ଇଞ୍ଜା ଖେଣ୍ଡି କିରଞ୍ଜୁ ଆଡ଼େୟିଏ; ଏଚେତିଏ
ଏ କିରଞ୍ଜୁ ମୀ କପାଟି ସାକି ହୀହାନା ହିରୁ ଲେହେଁ ମୀ ଆଙ୍ଗା
ଜିକେଏ ନାସା କିୟାନେ, ଇ ରାନ୍ତି ବେଲ୍ଲାତା ମିଙ୍ଗେତାକି ଦନ୍ କୃଡ଼ି
କିହାମାଞ୍ଜେରି □

୪ ହେଣ୍ଡୁ, ମୀ ଗୁଡ଼ିୟାତି ତାସା ଦାଃଆନାରାକି ନାଡ଼ିକିହାନା ଆମିନି
କୂଲି ହୀହା ହିଲଅତେରି, ଏଡ଼ି ଗାତି କାଲ୍ଲୁଝି ଆହିମାନେ, ଅଡ଼େ
ତାସାତି ଦାଃଆନାରି ଡ଼ୀନାୟି ବାରେ ବାଡ଼ମୁଟି ପ୍ରବୁତି କିୟିତୁ
ଏଗା ହାଚେୟିଏ □

୫ ମୀରୁ ଦାରତିତି ସୁକୁ ଅଡ଼େ ରାହାଁତା ନୀତାମାଞ୍ଜେରି, ମୀରୁ
ହାକିତି ଦିନାତାକି ଜାହାରାଇଁ ଆଙ୍ଗା କିହାମାଞ୍ଜେରି □

୬ ମୀରୁ ଦହ ହିଲାଆଗାଟାରାଇଁ ଦହ କିହାନା ପାୟିମାଞ୍ଜେରି;
ଏଞ୍ଜାସି ମିଙ୍ଗେ ଖେଣ୍ଡେ ଏନାଆଁ କିୟଅସି □

ସାସାତଲେ ପ୍ରାତାନା କିନାୟି

୭ ଏଡ଼ାଆଁତାକି ଏ ତାୟି ତାଙ୍ଗିସ୍ଲା, ପ୍ରବୁତି ଖାନି ଦିନା ପାତେକା
ସାସାତଲେ କାଟାନା ମାଞ୍ଜୁ, ର ତାସା କିନାସି ଏନିକିଁ ତାନି ବୁମିତି
ପାଡ଼େୟି ବେଟାଆହାଲି ତାକି ମୂଲୁତି ପିୟୁ ଅଡ଼େ ତାୟୁତି ପିୟୁ ରିନି
ଦିନା ପାତେକା ସାସାତଲେ କାପୁ କାଟାନା ଡ଼ୟିନେସି □

୮ ମୀରୁ ଜିକେଏ ଏଲେକିଁ ସାସାତଲେ ମାଞ୍ଜାନା ମୀ ହିୟାଁତି ସୁସି
କିଦୁ, ଇତିହୁଁ ପ୍ରବୁତି ଖାନି ଦିନା ତାଗେ ଖାଡ଼େୟିଏ □

୯ ଏ ତାୟି ତାଙ୍ଗିସ୍ଲା, ମୀରୁ ଏନିକିଁ ନୀହାୟି କିଞ୍ଜି ଆଅତେରି,
ଏଡ଼ାଆଁତାକି ରଅତେରି ରଅଣା କପାଟି ଏନି କାତା ଜଲ୍ଲାଆଦୁ,
ସିନିକିଦୁ, ନୀହାୟି କିନାସି ଦୁଖେରିତା ନିତାମାନେସି □

୧୦ ଏ ତାୟି ତାଜିସ୍ତା, ଆମିନି ମାହାପୁରୁ ଅଣ୍ଟପୁତି ବଲୁ ଖେହନାରି ପ୍ରବୁ ଦରୁତି କାତା ଖେସାମାତେରି, ଏଞ୍ଜାରାଙ୍କ ମୀରୁ ଅଣ୍ଟପାଦୁ, ଦୁକୁ କସ୍ତ ବେଟାଆନାଟି ସାସା ଅଡେ ଅରହାଲି ଜିରୁ ତସାମାଞ୍ଜାନେରି □

୧୧ ମେହ୍‌ଦୁ ଆମ୍ବାଆରି କସ୍ତ ଅରହା ମାତେରି, ମାମ୍ବୁ ଏଞ୍ଜାରାଙ୍କ ନେହ୍‌ରି ଇଞ୍ଜିଁ ଇନମି, ମୀରୁ ଆୟୁବତି ଅରହନାଣି ଖେଞ୍ଜାମାଞ୍ଜେରି, ଅଡେ ପ୍ରବୁ ତାୟୁତି କାମା ମେସାନା ପୁଞ୍ଜାମାଞ୍ଜେରି, ଏଞ୍ଜାସି କାର୍ମା ମେହ୍‌ନାସି ଅଡେ ଜୀଞ୍ଜୁ ନନାସି □

୧୨ ☆ ନା ତାୟି ତାଜିସ୍ତାତେରି, ମୀରୁ ପାରମାଣା କିଞ୍ଜୁଏ କିଆଦୁ, ଲାକପୁରୁତି ଦରୁତଲେ ପାରମାଣା କି ଦାରୁତିତି ଦରୁତି ପାରମାଣା କି ଏଟକାତି ଏନି ଦରୁ ଆସାନା ପାରମାଣା କିଆଦୁ, ସାମା ମୀଦି ହାଅ ଇନି କାତା ହାଅ ଆପେ ଇଞ୍ଜା ଆଏ ଇନି କାତା ଆଏ ଆପେ, ଏନିକିଁ ମୀରୁ ନୀହ୍‌ୟି ଦିନାତା ତଣ୍ଡ ଗାଟାତେରି ଆଅତେରି □

୧୩ ମୀ ବିତ୍ରାଟି ଆମ୍ବାଆସି ଦୁକୁ କିହିମାନେସି ? ଆତିହ୍‌ ଏଞ୍ଜାସି ପ୍ରାତାନା କିପାସି, ଆମ୍ବାଆସି ରାହ୍‌ଟି ମାନେସି ? ଇତିହ୍‌ ଏଞ୍ଜାସି ଜହରା ପାରୁ ପାଟାପେସି □

୧୪ ☆ ଆମ୍ବାଆସି ମୀ ବିତ୍ରାଟି ଆଡାଆ ଗାଟାସି ମାଟିହ୍‌ ଏଞ୍ଜାସି କୁଲମିତି ପ୍ରାଟିନାଙ୍ଗାଣି ହାଟାପେସି; ଇଞ୍ଜା ଏଞ୍ଜାରି ପ୍ରବୁତି ଦରୁତଲେ ନିୟ୍‌ ଖାକୁହାନା ଏଞ୍ଜାଣି ତାକି ପ୍ରାତାନା କିପାରି □

୧୫ ଏ ନାମୁଗାଟି ପ୍ରାତାନା ରଟା ଗାଟାଣାଙ୍କ ନେହ୍‌ କିନେ, ଇଞ୍ଜା ପ୍ରବୁ ଏଞ୍ଜାଣାଙ୍କ ନିକ୍‌ନେସି, ଇଞ୍ଜା ଏଞ୍ଜାସି ପାପୁ କିହାମାଟିହ୍‌, ଆତିହ୍‌ ଏଞ୍ଜାଣି ପାପୁ ମେଶ୍‌ଜି କିଞ୍ଜିଆନେ □

୧୬ ଏଡାଆଁତାକି ମୀରୁ ରଅତେରି ରଅଣା ନକିତା ମୀ ପାପୁ ଖେକ୍‌ଦୁ, ଅଡେ ନେହ୍‌ ଆହାଲିତାକି ରଅତେରି ରଅଣି ତାକି ପ୍ରାତାନା କିଦୁ, ଆତିହ୍‌ ମୀରୁ ନେହ୍‌ ଆଡେରି, ଏଡାଆଁତାକି ଇତିହ୍‌ ଦାର୍ମୁ ଗାଟାଣି ପ୍ରାତାନା ହାରେକା କାଜା କାମା କିହାଲି ଆଡିନେ □

୧୭ ଏଲିୟ ଜିକେଏ ମା ଲେହେଁତି ଦୁକୁ ସୁକୁ ଗାଟି ମାଣସି; ଏଞ୍ଜାସି ପିୟୁ ଆଆପେ ଇଞ୍ଜିଁ ରଣ୍ଡିଏ ମନତଲେ ପ୍ରାତାନା କିତେସି, ଅଡେ

ତାନି ବାର୍ଯ୍ୟା ସ ଲେଖୁ ପାତେକା ଏ ବୃମିତା ପିୟୁ ଆଆତେ □

^{୧୮} ଇଞ୍ଜା ଏଞ୍ଜାସି ଅଡ଼େ ଖେଣ୍ଡେ ପ୍ରାତାନା କିହାଲିଏ ହାଗୁଟି ପିୟୁ
ରୀତେ, ଅଡ଼େ ବୃମିତା ଆର୍ନା କାମିତେ □

^{୧୯} ଏ ନା ତାୟିୟା ଅଡ଼େ ତାଜିୟା, ମୀ ବିତ୍ରାଟି ଆମ୍ବାଆସି ସାତା
ଜିରୁତି ବାଣା ଆତିହୁ ଅଡ଼େ ଆମ୍ବାଆସି ଏଞ୍ଜାଣାଇଁ ଖେଣ୍ଡେ ଖେଟ୍‌ହା
ତାନେସି,

^{୨୦} ☆ଆତିହୁ ଆମ୍ବାଆସି ପାପୁ ଗାଟାଣାଇଁ ତାନି ପଲ୍ଲଆ ଜିରୁଟି
ଖେଟ୍‌ହା ତାନେସି, ଏଞ୍ଜାସି ଏଞ୍ଜାଣି ଜୀଞ୍ଜୁତି ହାକିଟି ଗେଲ୍‌ପିନେସି,
ଇଞ୍ଜା ହାରେକା ପାପୁତି ମେପ୍‌କି କିନେସି, ଇଦାଆଁ ମୀରୁ ପୁଞ୍ଜୁ □

ପୁସ୍ତକି ଖୋରା

The New Testament the Kusaal language (Ghana)

copyright © 1996 Wycliffe Bible Translators, Inc.

Language: Kusaal (Kuvi)

Contributor: Wycliffe Bible Translators, Inc.

ପୁସ୍ତକି ଖୋରା,

କୁସି ପୁସ୍ତକି ଖୋରା, 2020

The New Testament in Kuvi Language

The Word for the World International

All rights reserved.

2025-05-08

PDF generated using Haiola and XeLaTeX on 19 Dec 2025 from source
files dated 8 May 2025

c688c8bf-38ac-5c00-90bd-6e4eaa165a20